

Saopćavanje skrivenih stvari Vjerovjesniku, s.a.v.a.

Mučenička smrt Ammara



U djelu Kenzu-l-'ummal se prenosi od Huzejfa: „*Držite se skupine u kojoj je Ibn Sumejja, jer sam čuo Allahova Poslanika, s.a.v.a., kada kaže: 'Ubiće ga tlačiteljska skupina!'*”[1]

Mučenička smrt Imama Alija, mir s njim

Imam Ali, mir s njim, je rekao: „*Izvijestio me je Iskreni Pouzdani, s.a.v.a., da zasigurno neću umrijeti dok ne budem udaren ovdje (pokazujući na prednju lijevu stranu svoje glave) pa će ovo biti obličeno krvlju!*”[2]

Bitka oko deve

U djelu El-Melahimu ve-l-fiten se prenosi od Aiše i Ibrahima et-Tejmija da se Allahov Poslanik, s.a.v.a., obratio svojim suprugama riječima: „*Na koju će od vas zalajati psi Hav'aba?*” I kada je prolazila Aiša, psi su zalajali. Ona je pitala o tome pa joj je rečeno: 'To je voda u Hav'abu.' Rekla je: 'Mislim da ću se morati vratiti.' Na to joj je odgovoreno: 'O majko vjernika, ti ćeš samo miriti ljude!'"[3]

U djelu Kenzu-l-'ummal se prenosi od Ibn Abbasa da je Imam Ali, mir s njim, rekao Zubejru: „*Zaklinjem te Bogom, pamtiš li da smo zaista ja i ti bili u šatoru tog i tog, gdje smo se takmičili pa je naišao Allahov Poslanik, s.a.v.a., i rekao mi: 'Izgleda da ga voliš?!'* A ja sam upitao: 'A šta

me priječi?' Odgovorio je: 'Zaista, on će se boriti protiv tebe, a biće nasilnik!' Zubejr je uzviknuo: 'O moj Bože! Tako je, ti si me podsjetio na ono što sam bio zaboravio!' A potom je otišao.“[4]

Pobjeda nad Iranom i Bizantom

Imam Sadik, mir s njim, je prenio: „Kada je Allahov Poslanik, s.a.v.a., prokopavao kanal (Bitka na Hendeku) naišli su na tvrdu stijenu pa je Allahov Poslanik uzeo budak iz ruke Vladara vjernika, mir s njim, ili ruke Selmana, neka je Bog zadovoljan njime, i njime udario takvim udarcem da se stijena raspukla na troje. Tada je Allahov Poslanik, s.a.v.a., rekao: 'Ovim mojim udarcem oslobođene su mi riznice perzijskog kralja i bizantskog cara!' Njih dvojica rekoše jedan drugom: 'On nam obećava riznice Kralja i Cara, a niko od nas nije u stanju izaći porad sebe!'“[5]

Mučenička smrt Husejna, mir s njim

U djelu Kenzu-l-‘ummal se prenosi od Ummu Seleme: „Husejn, mir s njim, je ušao kod Allahovog Poslanika, s.a.v.a., a ja sam sjedila kod vrata pa sam se nadvirila i u šaci Vjerovjesnika, s.a.v.a., sam vidjela nešto što je on okretao dok Husejn spavaše na njegovom trbuhu. Ja sam upitala: 'O Allahov Poslaniče, provirila sam i vidjela te kako nešto okrećeš u svojoj šaci, dok dječak spavaše na tvom trbuhu a tebi su tekle suze.' On je odgovorio: 'Uistinu, došao mi je Džebrail sa grumenom zemlje na kojoj će on biti ubijen i izvijestio me da će ga ubiti moj ummet!'“[6]

Pobjeda nad Jevrejima

Allahov Poslanik, s.a.v.a., je rekao: „Neće nastupiti Čas (Smak svijeta) dok se oni koji su Bogu predani (muslimani) ne budu borili protiv Jevreja. Muslimani će ih ubijati tako da će se Jevreji sakrivati iza kamenja i drveća pa će kamenje i drveće govoriti: 'O ti koji si predan Bogu (muslimanu), o robe Božiji, evo jednog Jevreja iza mene, dođi i ubij ga!'“[7]

Iskušenje Mongolima

Allahov Poslanik, s.a.v.a., je rekao: „Neće nastupiti Čas sve dok muslimani ne budu zaratili s Turcima, narodom čija su lica poput kovanih štitova, koji oblači odjeću od kostrijeti i nosi obuću od kostrijeti.“[8]

Islamska revolucija na Istoku

Allahov Poslanik, s.a.v.a., je rekao: „Zaista, moju porodicu (Ehli-bejt) će poslije mene zadesiti iskušenje, protjerivanje i progonstvo, sve dok s Istoka ne dođe jedan narod s crnim bajracima. Oni će tražiti svoje pravo, ali ga neće dobiti pa će stupiti u borbu i biće pobjednici. Tada će im se davati ono što su tražili, ali oni neće prihvatiti, sve dok to ne budu dali jednom iz moje porodice, čije ime je podudarno mome imenu... On će zavladatai Zemljom i ispuniće je pravednošću i pravdom kao što su je oni ispunili nepravdom i nasiljem. Onaj od vas koji to dočeka ili onaj poslije vas neka im pristupi makar pritom puzio po snijegu, jer su to bajraci Upute!“[9]

Vjerovjesnik, s.a.v.a., zna skriveno Božijim podučavanjem

Kur'an:

عَالِمِ الْغَيْبِ فَلَا يُظْهِرُ عَلَى غَيْبِهِ أَحَدًا إِلَّا مَنِ ارْتَضَىٰ مِنْ رَسُولٍ فَإِنَّهُ يَسْلُكُ مِنْ بَيْنِ يَدَيْهِ وَيَمْنُ خَلْفَهُ رَصَدًا

On zna tajno i On tajno Svoje ne otkriva nikome, osim onome koga On za poslanika odabere; zato On i ispred njega i iza njega postavlja one koji će ga čuvati.[10]

Hadis:

Imam Sadik, mir s njim, je rekao: „Zaista, Allahovom Poslaniku, s.a.v.a., se izgubila deva pa su ljudi u vezi s njom govorili: 'On nas obavještava o onome s Neba, a ne obavještava nas o svojoj devi!' Tada mu se spustio Džibril i rekao: 'O Muhammede, tvoja deva je u toj i toj dolini i njezin povodac je omotan oko tog i tog drveta!' Prenosilac kaže: 'On se tada popeo na minber, izrekao zahvalu i pohvalu Bogu i rekao: 'O ljudi, mnogo ste mi prigovarali u vezi s mojom devom. Znajte, ono što mi je dao Bog je bolje od onog što je uzeo od mene! Znajte, moja deva je zaista u toj i toj dolini i njezin povodac je omotan oko tog i tog drveta!' Ljudi su tada požurili k njoj i našli su je onako kao što je rekao Allahov Poslanik, s.a.v.a.“[11]

[1]Kenzu-l-'ummal, sv. 11, str. 351, predaja 31719.

[2]Kenzu-l-'ummal, sv. 13, str. 192, predaja 36571.

[3]El-Melahimu ve-l-fiten, str. 76, predaja 18.

[4]Kenzu-l-'ummal, sv. 11, str. 332, predaja 31660.

[5]El-Kafi, sv. 8, str. 216, predaja 264.

[6]Kenzu-l-'ummal, sv. 13, str. 657, predaja 37668.

[7]Kenzu-l-'ummal, sv. 14, str. 208, predaja 38417.

[8]Kenzu-l-'ummal, sv. 14, str. 205, predaja 28405.

[9]Kenzu-l-'ummal, sv. 14, str. 267, predaja 38677.

[10]El-Džinn, 26-27.

[11]El-Kafi, sv. 8, str. 221, predaja 278.